



t Grunnegs gain toukornst?

t Zel joe net zo vergoan. Wat dou je as je van plan binnen om - ik nuim mor wat - ien haarstvekaanzie n dagje noar t Aailaand te goan? Ie hemmen gain zin om van kroug noar restaurant noar café te goan en dat weer noar boot weerom, dus je perbaaiern t zó te roaken dat je net n schiere dag trevven. Zo makkelk is dat nog nait, ook nait as mainste doagen van haarstvekaanzie mooi weer veur tied van t joar haren. Dat wait je immers noatied pas en din is t te loat. Wat dou je as je n dag ofhankelk wezen mouten van t weer, ie heuren noar de berichten. Wat zol KNMI der van zeggen? En Pelleboer vanzulf, wat kiek het dij der op?

Slim onzekere lu willen ook nog waiten wat Hans de Jong der van zegt, want dij wait n bult van t weer ien Vraislaand en aailanden binnen (tegenworreg) zowat apmoal van Hans Wiegel, is t nait zo?

Kort en goud: hou geleerd of ze wezen maggen, ons heren meteorologen, wie vertraauwen heur mor naauw as ze t over t weer van morgenvroug hemmen. En ik geef zulf mor n luk beetje veur heur verwachtings van t weer van overmorgen as t weerglaas op „bestendig” staait. Aans loof ik liekdoorns van mien achternicht nog laiver, bie wieze van spreken din.

Ik kom doar op ien verband mit hail aans wat. As je wat beleven willen, mout je n Grunneger boukje schrieven en veuraal n nij woordenboukje: dat is nijs en din heb je n bult aanloop van journalisten en n dag noatied belt elk en ain joe weer ais op, ze hemmen joe op petret zain ien kraant. Ook aal vertel je aan 100 journalisten 100 moal t aigenste verhaal, as zai der n verhaal van moaken is t 99 keer n aander dij aan t woord is: journalisten binnen mensen dat moakt kraant leesbaar. Aine verslaggever het hier meer oog veur, aander vaalt aans wat op.

Ien t veurwoord van t nije Grunneger buuswoordenboukje haar ik schreven, dat ik „bievubeld - nait extrao veul stadjer woorden opnomen haar: ik wis hou waineg t Stadjeders nog sproken wordt, doar zai je of heur je zowat nooit wat over.

Dat was nijs veur ain van n blad oet Stad en wat ien t veurwoord n opmaarken tussen hoakjes was, wer hier nijs veur t veurblad. Bie t votgoan vroug e nog (t was n goie journalist, dij vroagen t belangriekste op t leste der eefkes bie tussendeur), of t ien Ommelanden ook zo'n boudele was mit t Grunnegers. Nou, dat is gain kwestie: doar is belangstellen leste joar of wat zo tounomen, doar is t nait te vergelieken mit t Stad-Grunnegers. Of t toukornst het, zel tied wel leren...

eren...

t Het gain touvaal west, dou weer n week loater n aander man ien n aander kraant schreef dat t Grunnegers gain toukomst haar: ze zeden nou aal hoast apmoal „ik gaai” en nait „ik goa”, en „wie dudden” en nait „wie doun”. Conclusie was hail helder: ook al geef je honderd woordenbouken oet, t is doan mit t Grunnegers over n pooske.

Baaide manlu kinnen hail best geliek hemmen. As ain zegt, dat t apmoal wat touvalen zel, want veur honderd joar klougen ze ook aal over t oetstaarven van dialecten, din kin dij ook wel geliek hemmen. Wel zel t zeggen? Ik ien aals geval nait. t Grunnegers wordt haard aans, t wordt ien n bult opzichten aal meer Hollands. Ik denk dat t nog nooit zo haard aan t verandern west het as vandoag aan dag en der is gain holden of opmuiten aan, zo liekt t: t kin allinneg mor vanzulf overgoan.

„Ik gaat” is Grunnegers van distied en „wie dudden” ook: doar is mor ain schuld aan (as ik dat woord bruken mag), en dat binnen dij lu dij vonden dat heur kiender pas Grunnegers proaten moggen dou ze n bult op stroat touholden gingen. Dat is gain verwiet, mor slichtweg zeggen hou t kommen is.

Meschain zet dij ontwikkeln deur, meschain ook nait. Welke toalmeteoroloog duurt n veurspellen geven veur over vatteg, viefteg joar? Zólaank wordt ter minstens nog Grunnegers proat dat slim liekt op dat van de oldste mensen van tegenworreg en dou der din rusteg mor n rommeltje joaren bie ook.

Wel kin op zo'n termien taal veurspellen, as t KNMI en Pelleboer en Hans de Jong t al nait ains binnen over t weer van overmorgen? Ik stel veur dat we mor gewoon weer aan t goan en rusteg ofwachten wat weer of t worden zel.

SIEMON REKER